
Na osnovu člana IV. 4 a) Ustava Bosne i Hercegovine, Parlamentarna skupština Bosne i Hercegovine, na 53. sjednici Predstavničkog doma, održanoj 13. maja 2009. godine, i na 29. sjednici Doma naroda, održanoj 20. maja 2009. godine, usvojila je

ZAKON

O AGENCIJI ZA PRUŽANJE USLUGA U ZRAČNOJ PLOVIDBI BOSNE I HERCEGOVINE

DIO PRVI - OSNOVNE ODREDBE

Član 1.

(Predmet Zakona)

Ovim zakonom osniva se Agencija za pružanje usluga u zračnoj plovidbi Bosne i Hercegovine (u daljnjem tekstu: Agencija) i uređuje njen djelokrug, upravljanje Agencijom, kao i druga pitanja značajna za osnivanje i rad Agencije.

Član 2.

(Status i sjedište)

- (1) Agencija je neprofitna i finansijski samostalna institucija, koja ima svojstvo pravnog lica.
- (2) Sjedište Agencije je u Mostaru.

Član 3.

(Naziv)

- (1) Naziv Agencije je: Agencija za pružanje usluga u zračnoj plovidbi Bosne i Hercegovine.
- (2) Skraćeni naziv Agencije je BHANSA.
- (3) Naziv Agencije na engleskom jeziku je: "BH Air Navigation Services Agency".

Član 4.

(Djelatnost)

- (1) Djelatnost Agencije je:
 - a) pružanje usluga upravljanja zračnim saobraćajem,
 - b) pružanje komunikacijskih i navigacijskih usluga i usluga nadzora,
 - c) pružanje usluga aeronautičkog informiranja,
 - d) pružanje meteoroloških usluga za zračnu plovidbu,
 - e) poslovi spasilačkog koordinacionog centra u potrazi i spašavanju,
 - f) stručno školovanje i usavršavanje osoblja kontrole zračne plovidbe,
 - g) izvoz i uvoz za potrebe Agencije,
 - h) ostali poslovi i operacije koje su u funkciji sigurnog odvijanja zračne plovidbe.
- (2) Pružanje usluga iz stava (1) tačka a) ovog člana obuhvata sljedeće usluge:
 - a) usluge kontrole zračnog saobraćaja (oblasna, prilazna i aerodromska kontrola), različite usluge letnog informiranja, savjetodavne usluge u zračnom saobraćaju i usluge uzbunjivanja;

b) usluge upravljanja tokovima zračnog saobraćaja kojima se osigurava maksimalna iskorištenost kapaciteta kontrole zračnog saobraćaja, čiji je obim usklađen s kapacitetima koje utvrđuje Agencija, doprinoseći pritom sigurnom, urednom i efikasnom odvijanju zračnog saobraćaja;

c) usluge upravljanja zračnim prostorom, što podrazumijeva plansku funkciju s ključnim ciljem maksimiziranja upotrebljivosti raspoloživog zračnog prostora korištenjem dinamičke podjele vremena, a povremeno dijeljenjem zračnog prostora između različitih kategorija korisnika zračnog prostora;

d) usluge koordinacije za potrebe Jedinice za upravljanje zračnim prostorom (Airspace Management Cell-AMC), u čijem radu učestvuju i predstavnici koje imenuje Ministarstvo odbrane BiH.

(3) Pružanje usluga iz stava (1) tačka b) ovog člana obuhvata sljedeće usluge:

a) komunikacijske usluge, čije pružanje podrazumijeva upotrebu aeronautičkih fiksnih i mobilnih uređaja koji, u svrhu kontrole zračnog saobraćaja, omogućavaju komunikaciju na relacijama zemlja-zemlja, zrak-zemlja i zrak-zrak;

b) navigacijske usluge, čije pružanje podrazumijeva upotrebu uređaja koje zrakoplovu osiguravaju informacije o poziciji i vremenu;

c) usluge nadzora, čije pružanje podrazumijeva upotrebu uređaja radi određivanja odnosne pozicije zrakoplova s ciljem sigurnog razdvajanja.

(4) Pružanje usluga iz stava (1) tačka c) ovog člana podrazumijeva osiguravanje aeronautičkih informacija i podataka u okviru definiranog područja odgovornosti, koji su neophodni za sigurnost, urednost i efikasnost zračne navigacije.

(5) Pružanje usluga iz stava (1) tačka d) ovog člana podrazumijeva da Agencija osigura neophodne kapacitete s ciljem objavljivanja meteoroloških prognoza i izvještaja o trenutnoj vremenskoj situaciji, kao i bilo kakvih drugih meteoroloških informacija i podataka koje država osigura za aeronautičku upotrebu.

Član 5.

(Unutrašnja organizacija)

(1) Agencija u svom sastavu ima sljedeće organizacione jedinice:

a) Glavni ured u Mostaru;

b) Centar oblasne kontrole leta (ACC), s operativnim jedinicama u Sarajevu (ATCU I) i Banjoj Luci (ATCU II);

c) Operativno tehničke službe:

1) Službu meteorološkog bdijenja Bosne i Hercegovine u Banjoj Luci (BHMET),

2) Spasilačko - koordinacioni centar Bosne i Hercegovine (Rescue Co-ordination Centre - BHRCC) u Banjoj Luci,

3) Službu letnih informacija Bosne i Hercegovine (Flight Information Service - FIS) objedinjena s BHRCC u Banjoj Luci,

4) Službu zrakoplovnih informacija Bosne i Hercegovine (AIS BiH) u Mostaru,

5) Centar za obuku osoblja kontrole zračne plovidbe s ATC simulatorom u Mostaru,

6) Međunarodni NOTAM ured Bosne i Hercegovine (International NOTAM office - BH NOF) u Sarajevu,

d) Jedinice za pružanje usluga prilazne i aerodromske kontrole leta na kontroliranim aerodromima u Bosni i Hercegovini: Banja Luka, Mostar, Sarajevo i Tuzla.

(2) Pravilnik o unutrašnjoj organizaciji Agencije mora uvažavati odredabe stava (1) ovog člana.

Član 6.

(Sredstva za rad)

(1) Sredstava za rad Agencije bit će osigurana na sljedeći način:

a) Sva imovina i sredstva nabavljena iz EBRD kredita u okviru realizacije Strategije razvoja sistema upravljanja zračnim saobraćajem u Bosni i Hercegovini (u daljnjem tekstu: BHATM strategija) bit će upisana u knjigovodstvenu evidenciju Agencije nakon njenog osnivanja.

b) BHDCA će, kao nosilac provođenja BHATM strategije, prenijeti na Agenciju sva prava i obaveze koje proizlaze iz tog provođenja, uključujući i obavezu vraćanja kredita Evropskoj banci za obnovu i razvoj (u daljnjem tekstu: EBRD), kako je to definirano Ugovorom o zajmu br. 35288 s pripadajućim amandmanima koji je Bosna i Hercegovina zaključila sa EBRD ("Službeni glasnik BiH", br. 16/06). Ovaj prijenos bit će preciziran ugovorom koji će Agencija zaključiti sa EBRD-om odmah nakon registracije.

(2) S ciljem korištenja sredstava koja se vode u knjigovodstvenim evidencijama Federalne direkcije za civilno zrakoplovstvo/avijaciju (u daljnjem tekstu: FEDCAD) i Republičke direkcije za civilnu zračnu plovību (u daljnjem tekstu: RSCAD), a koja su od interesa za Agenciju radi pružanja usluga u zračnoj plovību, Agencija će nakon svog osnivanja zaključiti posebne ugovore s vlasnicima navedenih sredstava, kojima će precizirati način korištenja te imovine.

Član 7.

(Status zaposlenih)

(1) Na sve zaposlene u Agenciji primjenjuje se Zakon o radu u institucijama Bosne i Hercegovine ("Službeni glasnik BiH", br. 26/04, 7/05 i 48/05).

(2) U smislu ovog zakona, svi zaposleni izuzeti su od primjene Zakona o državnoj službi u institucijama Bosne i Hercegovine ("Službeni glasnik BiH", br. 19/02, 35/03, 4/04, 17/04, 26/04, 37/04, 48/05, 2/06 i 32/07) i Zakona o plaćama i naknadama u institucijama BiH ("Službeni glasnik BiH", br. 50/08).

DIO DRUGI - UPRAVLJANJE AGENCIJOM

Član 8.

(Prava, obaveze i odgovornosti osnivača)

(1) Prava, obaveze i odgovornosti, u ime osnivača Agencije, obavlja Parlamentarna skupština Bosne i Hercegovine i Vijeće ministara Bosne i Hercegovine (u daljnjem tekstu: Vijeće ministara).

(2) Parlamentarna skupština Bosne i Hercegovine usvaja razvojnu strategiju na prijedlog Vijeća ministara.

(3) Vijeće ministara:

a) odobrava poslovnu politiku Agencije,

b) daje saglasnost na Statut Agencije,

c) odobrava akt kojim se utvrđuju plaće, platni razredi i posebni dodaci na plaće zaposlenih u Agenciji,

d) usvaja godišnji program rada i finansijski plan Agencije,

-
- e) usvaja godišnji izvještaj Vijeća Agencije o radu Agencije,
 - f) po potrebi, imenuje nezavisno tijelo za reviziju finansijskog poslovanja,
 - g) daje saglasnost na kupovinu, prodaju, razmjenu, uzimanje ili davanje u lizing, uzimanje kredita i druge transakcije, u toku poslovne godine u obimu većem od jedne trećine knjigovodstvene vrijednosti imovine Agencije po stanju na kraju prethodne godine,
 - h) obavlja i druge poslove utvrđene ovim zakonom.

Član 9.
(Tijela)

Tijela Agencije su Vijeće Agencije i Uprava Agencije (u daljnjem tekstu: Uprava).

Član 10.
(Struktura Vijeća Agencije)

- (1) Vijeće Agencije ima sedam članova, i čine ga predstavnici:
 - a) Ministarstva komunikacija i prometa BiH,
 - b) Ministarstva odbrane BiH,
 - c) Ministarstva finansija i trezora BiH,
 - d) Vlade Republike Srpske,
 - e) Vlade Federacije Bosne i Hercegovine,
 - f) BHDCA i
 - g) Zaposlenih u Agenciji.
- (2) Članove Vijeća Agencije imenuje Vijeće ministara, na prijedlog ministra komunikacija i prometa BiH.
- (3) Institucije iz stava (1) tačka b) do f) ovog člana dužne su, na zahtjev ministra komunikacija i prometa BiH, u roku od 15 dana, predložiti svoje predstavnike za Vijeće Agencije.
- (4) Članovi Vijeća Agencije imenuju se na period od četiri godine s mogućnošću samo još jednog ponovnog imenovanja.
- (5) Prilikom imenovanja članova Vijeća Agencije, Vijeće ministara dužno je voditi računa o ravnopravnoj zastupljenosti svih konstitutivnih naroda u Bosni i Hercegovini.

Član
(Djelokrug Vijeća Agencije)

11.

Vijeće Agencije:

- a) nadzire poslovanje Agencije;
- b) nadzire rad Uprave;
- c) donosi Statut, uz saglasnost Vijeća ministara;
- d) predlaže godišnji program rada i finansijski plan Agencije;

-
- e) donosi Pravilnik o unutrašnjoj organizaciji i sistematizaciji radnih mjesta, uz saglasnosti Vijeća ministara;
 - f) donosi Etički kodeks Agencije;
 - g) usvaja izvještaje Uprave o poslovanju po polugodišnjem i godišnjem obračunu, s bilansom stanja i bilansom uspjeha;
 - h) podnosi Vijeću ministara godišnji izvještaj o poslovanju Agencije koji uključuje izvještaj nezavisnog revizora o reviziji;
 - i) daje saglasnost na kupovinu, prodaju, razmjenu, uzimanje ili davanje u lizing, uzimanje kredita i druge transakcije, u toku poslovne godine u obimu od 100.000,00 KM do jedne trećine knjigovodstvene vrijednosti imovine Agencije po bilansu stanja na kraju prethodne godine;
 - j) utvrđuje prijedlog osnovice za obračun plaća zaposlenih, platne razrede zaposlenih, naknade i posebne dodatke na plaću koji su u vezi sa specifičnom prirodom i složenošću posla;
 - k) formira povremene komisije i utvrđuje njihov sastav i radne zadatke;
 - l) obavlja i druge poslove utvrđene ovim zakonom.

Član 12.

(Rad Vijeća Agencije)

- (1) Vijeće Agencije donosi poslovnik o svom radu.
- (2) Vijeće Agencije može odlučivati ako je sjednici prisutno više od polovine njegovih članova.
- (3) Vijeće Agencije odlučuje prostom većinom glasova prisutnih članova, osim u slučajevima navedenim u članu 11. stav (1) tačka c) i h), kada je predviđeno jednoglasno usvajanje.
- (4) U slučaju kada je potrebna jednoglasna odluka Vijeća Agencije, to mora biti jednoglasno potvrđeno glasovima svih članova Vijeća Agencije.
- (5) Član Vijeća Agencije iz Ministarstva komunikacija i prometa BiH je predsjedavajući Vijeća Agencije. Predsjedavajući Vijeća Agencije odgovoran je za blagovremeno održavanje i pripremu sjednica te za potpisivanje svih akata koje donosi Vijeće Agencije.

Član 13.

(Sjednice Vijeća Agencije)

- (1) Vijeće Agencije održava sjednice po potrebi, a najmanje jednom u tri mjeseca.
- (2) Sjednicama Vijeća Agencije dužni su prisustvovati članovi Uprave.

Član 14.

(Naknada za rad)

- (1) Članovi Vijeća Agencije imaju pravo na naknadu za svoj rad i naknadu troškova službenog putovanja.
- (2) Naknada za rad članova Vijeća Agencije utvrđuje se posebnom odlukom Vijeća ministara, s tim da ona ne može biti veća od prosječne plaće isplaćene na nivou institucija BiH za prethodnu godinu.
- (3) Naknade troškova službenih putovanja obračunavaju se prema propisima kojima se uređuje naknada troškova službenih putovanja u Vijeću ministara.

Član 15.
(Uprava)

Upravu čine direktor i dva zamjenika direktora.

Član 16.
(Imenovanje Uprave)

(1) Članove Uprave na osnovu javnog konkursa, i na prijedlog Vijeća Agencije, imenuje Vijeće ministara. Ako Vijeće ministara ne prihvati prijedlog, Vijeće Agencije može u roku od 15 dana dati novi prijedlog s rang-liste uspješnih kandidata. Ako i u ovom slučaju prijedlog za imenovanje ne potvrdi Vijeće ministara, javni konkurs se ponavlja.

(2) Javni konkurs provodi se u skladu sa Zakonom o ministarskim imenovanjima, imenovanjima Vijeća ministara i drugim imenovanjima Bosne i Hercegovine ("Službeni glasnik BiH", br. 7/03 i 37/03).

(3) Za člana Uprave može biti imenovano lice:

- a) koje zadovoljava uslove za imenovanje prema Zakonu o ministarskim imenovanjima, imenovanjima Vijeća ministara i drugim imenovanjima Bosne i Hercegovine,
- b) koje ima najmanje VII. stepen stručne spreme,
- c) koje ima najmanje pet godina radnog iskustva u civilnom zrakoplovstvu, i
- d) koje zadovoljava i posebne uslove za imenovanje člana Uprave utvrđene Statutom Agencije.

(4) Prilikom imenovanja članova Uprave, Vijeće ministara dužno je voditi računa o ravnopravnoj nacionalnoj i entitetskoj zastupljenosti.

(5) Mandat članova Uprave traje pet godina, s mogućnošću samo još jednog ponovnog imenovanja.

(6) Isto lice ne može istovremeno biti član Uprave i član Vijeća Agencije.

Član 17.
(Poslovi Uprave)

(1) Direktor predsjedava Upravom, rukovodi poslovanjem, zastupa i predstavlja Agenciju i odgovara za zakonitost poslovanja Agencije.

(2) Direktor je posebno odgovoran za:

- a) upravljanje resursima, programima, službama i osobljem Agencije;
- b) predlaganje poslovne politike Agencije;
- c) provođenje poslovne politike i planova poslovanja i razvoja;
- d) provođenje odluka Vijeća Agencije;
- e) donošenje općih akata Agencije;
- f) pripremanje polugodišnjih i godišnjih izvještaja o poslovnim aktivnostima i njihovo podnošenje Vijeću Agencije;
- g) provođenje svih drugih aktivnosti koje Vijeće Agencije smatra neophodnim i koje su potrebne za efikasno poslovanje Agencije, u skladu s ovim zakonom, Statutom i drugim aktima Agencije.

(3) Djelokrug zamjenika direktora, njihova prava, obaveze i odgovornosti za rukovođenje i upravljanje Agencijom bit će utvrđeni Statutom.

(4) Direktor pismeno ovlašćuje jednog od zamjenika da ga zamjenjuje u slučaju spriječenosti. U tom slučaju, zamjenik obavlja sve poslove direktora.

DIO TREĆI - OPĆI AKTI AGENCIJE

Član 18. (Statut)

(1) Agencija ima Statut koji sadrži odredbe o:

- a) nazivu i sjedištu Agencije;
 - b) djelatnosti Agencije;
 - c) vrijednosti imovine koja je u vlasništvu Agencije;
 - d) vođenju poslovanja i zastupanju Agencije;
 - e) pravima i obavezama osnivača;
 - f) organizaciji Agencije;
 - g) upravljanju i načinu rada i donošenja odluka, sastavu, načinu imenovanja i razrješenja, pravima, obavezama i odgovornostima članova tijela Agencije;
 - h) općim i posebnim uslovima i načinu imenovanja člana Vijeća Agencije između zaposlenih u Agenciji;
 - i) posebnim uslovima za imenovanje članova Uprave;
 - j) djelokrugu članova Uprave;
 - k) upravljanju Agencijom;
 - l) informiranju osnivača o poslovanju Agencije;
 - m) ostalim pitanjima važnim za poslovanje Agencije.
- (2) Statut Agencije objavljuje se u "Službenom glasniku BiH" .

Član 19. (Opći akti i Etički kodeks)

(1) Općim aktima Agencije, u skladu sa zakonskim propisima, uredit će se zapošljavanje i radni odnosi u Agenciji, finansije, računovodstvo, unutrašnja organizacija i sistematizacija poslova te druga pitanja značajna za obavljanje poslova Agencije.

(2) Etički kodeks Agencije utvrđuje etičke dužnosti i obaveze članova tijela Agencije i zaposlenih u Agenciji.

DIO ČETVRTI - POSLOVANJE AGENCIJE

Član 20. (Djelokrug pružanja usluga)

(1) Agencija će pružati usluge u zračnoj plovidbi u zračnom prostoru Bosne i Hercegovine za područje letnih informacija (FIR Sarajevo).

(2) Agencija može pružati usluge u zračnoj plovidbi i izvan zračnog prostora Bosne i Hercegovine, ako je to regulirano međunarodnim sporazumom u kojem je jedna od ugovornih strana Bosna i Hercegovina.

Član 21.
(Certificiranje)

(1) Agencija može pružati usluge u zračnoj plovidbi samo ako ima certifikat o ispunjavanju uslova za pružanje usluga u zračnoj plovidbi.

(2) Certifikat o ispunjavanju uslova za pružanje usluga u zračnoj plovidbi izdaje BHDCA.

Član 22.
(Finansiranje)

(1) Za svoj rad Agencija ostvaruje prihode iz:

- a) naknada od korisnika za pružene usluge u zračnoj plovidbi;
- b) drugih izvora u skladu s posebnim propisima.

(2) Visinu naknada iz stava (1) tačka a) ovog člana, koji se odnose na naknade od preleta, na prijedlog direktora Agencije, utvrđuje Vijeće ministara u skladu s obavezama preuzetim iz međunarodnih ugovora. Visinu naknada za ostale usluge koje se pružaju u zračnoj plovidbi, na prijedlog direktora Agencije, utvrđuje Vijeće Agencije.

(3) Naknade iz stava (1) tačka a) ovog člana ne naplaćuju se za:

- a) letove koji su izuzeti od plaćanja prema propisima Evropske organizacije za sigurnost zračne plovidbe (u daljnjem tekstu: EUROCONTROL);
- b) letove koji su izuzeti od plaćanja odlukom ministra komunikacija i prometa BiH.

Član 23.
(Pokriće gubitka)

U slučaju nemogućnosti Agencije da pokrije troškove nastale prilikom pružanja usluga u zračnoj plovidbi, institucije Bosne i Hercegovine snosit će nepokriveni dio troškova.

Član 24.
(Finansijsko poslovanje i revizija)

(1) Organi Agencije osigurati će da finansijsko poslovanje Agencije bude u potpunosti transparentno korisnicima usluga u zračnoj plovidbi i građanima Bosne i Hercegovine.

(2) Finansijsko poslovanje Agencije obavlja se u skladu s općim aktima Agencije, kao i važećom računovodstvenom praksom.

(3) Finansijsko poslovanje Agencije mora biti usklađeno s odgovarajućim propisima EUROCONTROL-a.

(4) Reviziju godišnjih finansijskih izvještaja vršit će nezavisna revizorska firma.

(5) Uprava će osigurati da godišnji finansijski izvještaji Agencije budu revidirani u roku od 120 dana od završetka fiskalne godine Agencije.

(6) S ciljem osiguranja transparentnosti finansijskog poslovanja korisnicima usluga u zračnoj plovidbi, godišnji finansijski izvještaji Agencije odvojeno će prikazivati finansijske efekte pružanja usluga u zračnoj plovidbi po pojedinim tipovima usluga.

(7) Godišnji finansijski izvještaji Agencije objavljuvat će se u "Službenom glasniku BiH" na jezicima u službenoj upotrebi u Bosni i Hercegovini i na engleskom jeziku.

Član 25.

(Odgovornost za štetu)

- (1) Agencija odgovara za štetu učinjenu trećim licima cjelokupnom svojom imovinom.
- (2) Osnivač Agencije garantira za štetu koju pri obavljanju svojih poslova Agencija prićini trećim licima.
- (3) U slučaju nadoknade štete iz stava (2) ovog člana, osnivač Agencije ima pravo na povrat sredstava.
- (4) Agencija je obavezna osigurati se od rizika štete.

Član 26.

(Nacionalna struktura zaposlenih)

Nacionalna struktura zaposlenih u Agenciji odražavat će rezultate posljednjeg popisa stanovništva u Bosni i Hercegovini.

Član 27.

(Saradnja s organima uprave i drugim pravnim licima)

- (1) Organi uprave, javne korporacije, komore i druga pravna lica dužna su Agenciji, na njen zahtjev, dostaviti podatke koji se odnose na sigurno, redovno i nesmetano odvijanje zračnog saobraćaja.
- (2) Organi uprave, javne korporacije, komore i druga pravna lica dužni su, prilikom ispunjavanja zahtjeva koji se odnose na telekomunikacije ili prosljeđivanje informacija značajnih za sigurnost zračnog saobraćaja i rad Agencije, postupati bez odgađanja i dati prioritet ispunjavanju ovih zahtjeva.

Član 28.

(Ovlaštenja ministra komunikacija i prometa BiH u slučaju štrajka)

- (1) Ministar komunikacija i prometa BiH ovlašten je da, u slučaju štrajka u Agenciji, svojom odlukom utvrdi najnužnije odvijanje zračnog saobraćaja radi zaštite posebnih interesa Bosne i Hercegovine, drugih pravnih lica ili građana na određenom području.
- (2) Zaposleni koji obavljaju poslove i zadatke u provođenju odluke iz stava (1) ovog člana dužni su za vrijeme štrajka provoditi naloge koje izdaje direktor Agencije, a u slučaju njegove sprijećenosti, ovlašteni zamjenik direktora.

DIO PETI - PRIJELAZNE I ZAVRŠNE ODREDBE

Član 29.

(Izbor i imenovanje tijela Agencije)

- (1) Ministar komunikacija i prometa BiH pokrenut će postupak za izbor i imenovanje članova Vijeća Agencije u roku od 15 dana od dana stupanja na snagu ovog zakona.
- (2) Vijeće Agencije će nakon konstituiranja u roku od 15 dana pokrenuti postupak za izbor članova Uprave Agencije i izvršiti imenovanja vršioća dužnosti Uprave Agencije, uz saglasnost Vijeća ministara.

Član 30.

(Registracija)

(1) Agencija će biti registrirana kao pravno lice Bosne i Hercegovine, u skladu sa Zakonom o registraciji pravnih lica koja osnivaju institucije Bosne i Hercegovine ("Službeni glasnik BiH", br. 37/03).

(2) BHDCA je dužna provesti sve aktivnosti potrebne za registraciju i početak rada Agencije.

Član 31.

(Prijenos funkcija)

(1) BHDCA će, u koordinaciji s tijelima Agencije, nastaviti realizirati BHATM strategiju do potpunog uspostavljanja jedinstvenog sistema za pružanje usluga oblasne kontrole zračnog saobraćaja s pripadajućim operativno-tehničkim službama.

(2) FEDCAD i RSCAD prenijet će funkcije prilazne i aerodromske kontrole zračnog saobraćaja na Agenciju najkasnije do tehničko-operativnog uspostavljanja jedinstvenog sistema za pružanje usluga oblasne kontrole zračnog saobraćaja, s pripadajućim operativno-tehničkim službama.

Član 32.

(Pristup imovini)

FEDCAD, RSCAD, Federacija Bosne i Hercegovine i Republika Srpska obavezuju se da će Agenciji dopustiti slobodan pristup korištenju imovine i prije zaključivanja posebnih ugovora kako je to navedeno u članu 6. stav (2) ovog zakona, kako se ne bi dovela u pitanje sigurnost zračne plovidbe (safety).

Član 33.

(Preuzimanje zaposlenih)

(1) Agencija je dužna preuzeti sve zaposlene iz BHDCA, FEDCAD i RSCAD, koji u vrijeme stupanja na snagu ovog zakona obavljaju poslove iz djelokruga Agencije.

(2) Preuzeto osoblje bit će raspoređeno na odgovarajuća radna mjesta uzimajući pri tome u obzir stručnu spremu, zadatke i dužnosti koje ti zaposleni obavljaju u momentu stupanja na snagu ovog zakona.

Član 34.

(Prestanak primjene pojedinih odredbi Zakona o zrakoplovstvu BiH)

Stupanjem na snagu ovog zakona prestaju da važe odredbe Zakona o zrakoplovstvu BiH ("Službeni glasnik BiH", br. 2/04), a odnose se na predmet ovog zakona.

Član 35.

(Stupanje na snagu)

Ovaj Zakon stupa na snagu osmog dana od dana objavljivanja u "Službenom glasniku BiH".

PSBiH, broj 355/09
20. maja 2009. godine
Sarajevo

Predsjedavajući
Predstavničkog doma
Parlamentarne skupštine BiH
Beriz Belkić, s. r.

Predsjedavajući
Doma naroda
Parlamentarne skupštine BiH
Ilija Filipović, s. r.